

ROSANKENARE PABLO ROTYAANTZINIRI GALACIA-SATZIITE

Wethataantsi

1 ¹Naakatake Pablo otyaantzimiroi jiroka osankenarentsi.
Otyaantaperori nini naaka. Kaari atziripaini otyaantenane,
Jesucristo otyaantakenari itsipatakari Ashitairi Pawa owiriintairiri
pairani ikamawetakaga Jesucristo. ²Ari notsipatari maawoini
iyekiite kemisantanaatsiri jaka nosankenatzimirowa jiroka.
Eerokapaini notyaantzini pikaatzi pikemisantai janta Galacia-
ki. ³Onkamintha ineshironkayetaimi Ashitairi Pawa, kameetha
risaikakaayetaimi, ari inkantzitemiri eejatzi Awinkatharite
Jesucristo. ⁴Tema iro ikowakeri Ashitairi Pawa rishinewentai Cristo,
ikamawentayetakai akaariperoshirewetakaga, ari onkantya eero
oshiyakotantari ikaatzi kaariperowitzatsiri iroñaaka, oshiyawaitakawo
rontsiparyaaakowentaatyaima. ⁵Onkamintha impinkathatapiintaiteri
Pawa. Ari ashi owaatyero.

Tekaatsi otsipa Kameethari Ñaantsi owawisaakoshiretantatsine

⁶Pomapokantakenawo intsipaite pipakaanakero pikemisantawetarira
Pawa. Tema iriitake yoyaawetaimiri, antawoite retakoyetzimi,
irotake rotyaantantakemiriri Cristo. ⁷Oitaka pikemisantantawori
otsipa kaari oshiyawone Kameethari Ñaantsi? ⁷Tema kyaaryoo
nonkante naaka, tekaatsi otsipa ñaantsi owawisaakoshiretantatsine.
Tzimatsi pakaakaakemirori, ikowatzi roitzipinaashiretemi,
irotake rowashiñaayetakawori ikenkithatakoyetziri Cristo.
⁸Arime nowashiñaayetaimirome nokenkithatakakemiriri pairani,
rowasanketaitenata naaka. Ari oshiyawo eejatzi, arime ripokeme
maninkariite poñaachari inkiteki, inkenkithatakotapaakerorika otsipa
ñaaantsi kaari oshiyawone nokamantakemiriri pairani, rowasanketaiteriita

irirori. ⁹Ari nokantzitakemi pairani, irootake napiitemiri nonkantemi: Tzimatsirika owashiñaakerone nokenkithatakotakeriri Cristo pairani, rowasanketaiterita.

¹⁰ ¿Irooma nithotyaakotzi kameethatzimotziriri atziripaini?
¡Te! Nithotyaakotziiro kameethatzimotziriri Pawa. Iroorikame nithotyaakote kameethatzimotziriri atziripaini, te rimperatana Jesucristo naaka.

Rantaware Pablo

¹¹ Pinkeme iyekiite, okaatzi nokamantakemiri Kameethari Naantsi, kaari atziri yotakainawone. ¹²Iri Jesucristo yotaakenawori maawoini, tema kaari atziri ashityaaawone. ¹³Pikemakotaiyakenani tsika nokantaweta pairani eeniro nimonkaayewetawo rameyetari nosheninkapaini Judá-ite. Pikemakotaiyakenani eejatzi osheki nokisaneentayewetakari ikaatzi kemisantziriri Pawa, nowasanketakaantake osheki, nokowaweta nipakaakairime ikemisantziri. ¹⁴Tema nimaperowetanakityaawo naaka nimonkaawetawo rameyetari pairani nosheninkapaini, tekaatsi anayenane nokantawetakaga. ¹⁵Iro kantzimaitacha pairani tekera notzimiita naaka, riyoyiitakena Pawa. Antawoite retakotakena irootake rowawisaakoshiretantakenari. ¹⁶Roñaagaanari Itomi, niyotakotairi. Ikowake nonkenkithatakairi kaari Judá-itetatsine tsika okantakota rawisakoshiretantaitari. Tekaatsi atziri nosampitanake nonkanteri: “¿Oitaka nanteri?” ¹⁷Te nishiyashitapaintari Jerusalén-satzi etayetakawori rotyaataperoritzi. Apatziro nowanakero niyaatanake Arabia-ki, irojatzi nipiyyantapaaka Damasco-ki.

¹⁸ Okanta awisake mawa osarentsi, ari niyaatashitakeri Pedro risaiki irirori Jerusalén-ki, apatziro nisaikimowaitapaintziri okaatzi ¹⁵kiteesheri. ¹⁹Iro kantacha te noñaapaake itsipa Otyaantaperori, apatziro noñaapaakeri Jacobo irirentzi Awinkatharite.^a ²⁰Imaperotaty okaatzi nosankenatzimiri, te namatawitzimi, riyotzi irirori Pawa. ²¹Irojatzi niyaatantaka nampitsiki Siria eejatzi Cilicia-ki. ²²Tekera iñaayetanaata Judea-satzi ikaatzira kemisantziriri Cristo, ²³apatziro ikemakotashitana ikantaitzi: “Jirintaganki koshekairi pairani ikisaneentai, kowawetachari rithonkai, ikenkithatakotairo iroñaaka irirori tsika ikantaita ikemisantaitzi.” ²⁴Irootake ipinkathatantakariri iroñaaka Pawa ikemakot akenaga.

2 ¹Okanta awisake 14 osarentsi, ari niyaatake eejatzi Jerusalén-ki notsipatanakari Bernabé eejatzi Tito. ²Iro niyaatantakari tema Pawa ominthashiryaakaakenari. Okanta nareetaka janta, niyoyaapaakeri jewayetziriri kemisantzinkari, nokenkithatakotapaakero

a 1.19 Jacobo, irijatzi iitzitaitari eejatzi Santiago.

okaatzi nokamantayetairiri Kameethari Ñaantsi kaari nosheninkata. Iro niyoyaantapaakariri ompoñaantyaari eero aminaashiwaitanta okaatzi nantayetakeri.³ Te ishintsineentitawakeri notsipatakari Tito ritomeshaanitakaityaari, okantaweta Grecia-thato riñaanetari irirori, kaari nosheninka.⁴ Ari rosatekawaitakari kashaawaitawori inkemisanteme, iri kowawetachari ritomeshaanitakaantyaame. Te inimotziri irirori risaikashiwaitaiya kemisantayetatsiri rontsiparyakowentayetairi Jesucristo. Iro ikowaperotaiyini roshiyakotaari imperataarewo.⁵ Iro kantacha te nishinetakaantero roshiyakoityaari, iro nokowaperotake Riyotakoperotero Kameethari Ñaantsi awisakoshirentantaiyaari.⁶ Ikanta nokenkithawaitakaapaaikeri itzinkami kemisantzinkari, inimotanakeri, tekaatsi otsipa ñaantsi inkantanakeri. (Nokenakaashineentakawo nokantake “itzinkami kemisantzinkari”, tema tekaatsi atziri oshiyakotaarine Pawa iriiperori rini.)⁷ Iro kaari otzimanta inkantawakenari, tema Riyotanake imaperotaty rotyaantakena Pawa nonkenkithatakotainiri Kameethari Ñaantsi kaari tomeshaanitachane. Ari roshiyakaakeri irirori Pedro rotyaantakeri inkenkithatakaayetairi nokaatzira nitomeshaaniyeta.⁸ Tema iriitake Pawa otyaantakeriri Pedro inkenkithatakaayetairi tomeshaanitzinkari. Irrijatzi otyaantakenari naaka nonkenkithatakaayetairi kaari nosheninkata.⁹ Ikanta Jacobo, Pedro eejatzi Juan, etayetakawori reewatziri kemisantzinkari, Riyotanake iri Pawa etakotaanari, iri nintakaakenawori nantayetakeri. Arripaite raakameethatanakena, ari ikantawakeri eejatzi Bernabé, iro ompoñaantyaari niyaatakaantyaawori nonkenkithatakaayetairi kaari nosheninkata. Ari inkantanakaari irirori inkenkithatakaayetairi ikaatzia tomeshaanitachari.^b¹⁰ Irojatzi ikantantanakenari: “Arika piyatake tsikarika, ontzimatye petakoyetaiyaari ashironkainkaripaini.” Aritake netakotzitakari, irootake nantapiintakeri.

Ikisathaitziri Pedro Antioquía-ki

¹¹ Ikanta ryaatake Pedro Antioquía-ki, eenitatsi ikenakaashitakari irirori, ari nokesathatakeri. ¹² Tema owakera ryaatake Antioquía-ki, rimawetapaakawo kameethari, rakiyootapaakeri kaari isheninkata. Iro kantacha rareetaiyakan rotyaantanewo Jacobo, ari otzmanake iyenashitanewo Pedro, ripakaanakero rakiyoowetari kaari isheninkata. Antawoite ithaawakaari areeyetapainchari ametawori ritomeshaanita. ¹³ Rimatzitanakawo itsipa Judá-ite kemisantawetachari, ari ikantitanakari eejatzi Bernabé irirori, roshiyakotanakari jirikapaini. ¹⁴ Ikanta noñaakeri Pedro te rimonkaatziro irooperori Kameethari

b 2.9 Pedro, irijatzi iitzitaitari Cefas.

Ñaantsi, ari nopyotakeri ikaatzi kemisantatsiri, iñagaiyakenani maawoini nokantakeri Pedro: “Judá-ite pini eeroka, tema pipakaakero ameyetari pairani poshiyakotari kaari ashenkata. ¿Oitaka pishintsineentantariri atziripaini kaari Judá-itetsine roshiyakotairo akantayetaga aakapaini? ¹⁵ Imaperowetaty a-judá-itetzti aakapaini, te oshiyakowetari kaari ashenkata ikantaitapiintawetari ‘kaariperoshireri.’ ¹⁶ Iro kantacha, ayotzi iroñaaka tekaatsi materone intampatzikashirete rimonkaaterome Inintakaantaitanewo, tema apatziro rimatziro Jesucristo itampatzikashiretakai awentaashiretarira. Irootake awentaantaariri aaka, antampatzikashiretaira. Tema te imatero otampatzikashiretante Inintakaantaitanewo.” ¹⁷ Aamashitya tzimatsi kantaine: “Pithotyaakotanakero rotampatzikashiretemi Jesucristo, iro kantacha eekero pantatziro kaariperori. Iriira Jesucristo kaariperoshiretakaimiri.” Nokantzi naaka: ¡Te ari onkene! ¹⁸ Iro aminaashiwaitachari ashintsineentawakaiya, ankante: “Jame amonkaayetairo maawoini Inintakaantaitanewo.” Iro oshiyawaitakawori nipooker oitarika kaari wetsikachane kameetha, iroatzi napiitantaiyaawome niwetsikairo tsika okanta ketziroini. ¹⁹ Tema oshiyawaitakawo nonkamapithatakityeerome naaka Inintakaantaitanewo, ari okaatapaake nopankenawetawo nimonkaayetairo. Apatziro noñiilo nañagai nantayetainiri okaatzi inintakaanari Pawa. ²⁰ Noshiyakaanakero nontsipatatyeyaaarime Cristo ikemaatsitakagaitakarira pairani ikentakoitakeri. Tema noshiyanaatyaari ikanta kaminkari, tekaatsi rantanai, okaatzi nantanairi te naaka nintakaashityaawone, Cristo antakaanawori. Nawentaanaari Itomi Pawa, tema antawoite retakotaana, ikamawentaana. ²¹ Te nokowi napaatero ineshironkataanaga Pawa. Irootake kaari nokantanta: “Jame amonkaatero Inintakaantaitanewo añaantyaawori awisakoshireyetai.” Arime onkantyaame niñaawaite, aminaashiwaitaga ikamawentayetakaira Cristo.

Risaikashiretantai Tasorenkantsi awentaashiretyaaririka Cristo

3 ¹Iyekiite nampiyetawori Galacia-ki, ¿tsika okenakeka piyorenka? ¿Itaka amatawitakemiri? Pairani osheki nokenkithataakemiro tsika ikantaitakeri Jesucristo ikentakoitakeri. ²Apatziro nokowi nosampitemi tsika ikanta risaikashiretantakemi Tasorenkantsi. ¿Irooma risaikashiretantzimiri pimonkaayetziro Inintakaantaitanewo? ¡Te! Iro kantakaawori pawentaashiretanaarira Cristo. ³ ¿Pipeyakotakeroma rotampatzikashiretakemira Tasorenkantsi? ¿Irooma pikenkithashiryaari piñaashintsowiitya apaniroini piwathaki iro thotyagaimine otampatzikashiretaimi? ⁴ ¿Aminaashitama okaatzi pikemaatsiwentakari pairani? Te aminaashiwaita. ⁵ Tema Pawa otyaantakemiriri Tasorenkantsi, ritasonkawentayetakemi, piñaayetairo

kaari piñaapiintaweta. ¿Irooma piñaantayetakawori okantakaantziro pimonkaayetziro Inintakaantaitanewo? Te. Iroowa piñaantakawori pawentaanaarira Jesucristo.

Raapatziyawaka Pawa itsipatari Abraham

⁶Tema pairani Abraham-ni rawentaanakari Pawa, irootake roshiyakaantaariri rotampatzikashiretanewo. ⁷Iro piyotaiyerini eeroka, inkaate awentaashiretaachane, iriitake matakeroi roshiyakotaari Abraham-ni. ⁸Jiroka Osankenarentsiperō ikenkithawaitakeri Pawa pairani riñaanatziri Abraham-ni, tema riyotzitaka aritake rotampatzikashiretairi itsipasatzi atziripaini kaari Judá-itetatsine arika rawentaashiretaiyaari. Ikantake:

Tasonkawentaarewo pini eeroka pawentaashiretaana,
Ari nonkantairiri ejatzi itsipasatzi atziripaini.

⁹Ari ikantzimaitaka Pawa tasonkawenta rowayetairi awentaashiretzinkari, roshiyakagairi tsika ikantakeri pairani Abraham-ni rawentaashiretakarira.

¹⁰Tema ikaatzi awentaawori rimonkaayetairome Inintakaantaitanewo, te okanta rimonkaayetero, ari rashironkaayetaiya. Tema rosankenaitake kantatsiri:

Ari rashironkaayetaiya kaari monkaaterone Inintakaantaitanewo.

¹¹Ari okantzimaita, tema tekaatsi materone intampatzikashiretzimoteri Pawa rimonkaataiterome Inintakaantaitanewo. Irootake ikantantitarí osankenarentsiki:

Tampatzikashireri rinatye awentaashireri, ari iñagairo
rañaantaiyaawo.

¹²Irooma Inintakaantaitanewo te ari onkantya, tema rosankenaitake kantatsiri:

Inkaaterika monkaatairone, iriitake ñagairone rañaashireyetai.

¹³Ikamíntha Cristo rontsiparyaa kowentai rowasankewentaiterome Inintakaantaitanewo iri rashitakagaitaka apaniroini rowasankeetakeri. (Iriitake okantakotakeri osankenarentsi, ikantaitake pairani:

Owasanketaarewo rini ithataitziri inchakotaki.)

¹⁴Iro rantantakawori jiroka Jesucristo, tema irootake ikashaakagaitakeriri pairani Abraham-ni. Iro opoñaantaari iñaantayetaawori kaari Judá-itetatsi ritasonkawentayeeetairi, itsipashireyetai maawoini Tasorenkantsi awentaashiretarira.

¹⁵Pinkeme iyekiite nonkenkithatakotemiro ameyetari aaka. Ontzimerika oita aapatziyawakayaari, osankenatakotziro riyotantaityaari tzimatsi akashaakaakeriri asheninka. Arika osankenatakotakya, tekaatsi materone rowashiñagairo okaatzi osankenatainchari. ¹⁶Iro rantakeri pairani Pawa, eenitatsi ikashaakaakeniriri Abraham-ni

intsipataakeri icharinetari. Piñaakero iyekiite, te ikenkithatakotziri jaka inkaate incharineyetyaari Abraham-ni, apatziro ikenkithatakota apaani incharinetyaari, iriitake Cristo. ¹⁷Piñaakero, iriitake retaka Pawa pairani Abraham-ni ikashaakaakeri, ikantakeri: “Abraham, tzimatsi aapatziyawakayaari.” Irojatzi awisantakari okaatzi 430 osarentsi, ari rimpoitairi Moisés-ni rosankenayetairo Inintakaantanewo Pawa. Iro kantzimaitacha okaatzi rosankenayetakeri Moisés-ni, te owashiñiilo ikashaakaakerir Pawa pairani Abraham-ni. ¹⁸Tema iroome kowaperotachane amonkaayetairome Inintakaantaitanewo añaantyaawori impayetairo Pawa, aminaashityaame ikashaakaakerir Pawa pairani Abraham-ni. Tema pairani te otzimaweta Inintakaantaitanewo rimonkaaterime Abraham-ni, apatziro rawentaashiretakari Pawa, irootake ikashaakaantakariri rowawisaakoshiretairi.

Iitaka otzimantari Inintakaantaitanewo

¹⁹ ¿Iitaka otzimantari Inintakaantaitanewo? Iro otzimantari oñaagantero iwyathanka atziripaini, irojatzi rareetantakya icharinetari Abraham-ni ikantaitakerir Pawa. Iri rotyaantake Pawa maninkariite rosankenatakairi Moisés-ni Inintakaantaitanewo. Iri Moisés kantakowentakerir atziripaini. ²⁰Tema tzimatsi osheki kantakowentantaneri. Iriima Pawa apaani ikanta irirori.

²¹ ¿Owashiñaakeroma Inintakaantaitanewo ikashaakaakenir Pawa pairani Abraham-ni? Te owashiñiilo. Iroome owawisaakoshiretantsine Inintakaantaitanewo, aritake imatakerome ontsiparyaakowentaim antampatzikashireyetai arika amonkaayetanairo. ²²Iro kantacha, ooñaawontakairo osankenarentsi imapero akaariperoshirewetaka. Ontzimatye awentaashiretaiyaari Jesucristo, añaantaiyaawori ikashaakaakairi pairani Pawa.

²³ Tema pairani tekera awentaashiretaiyaata, oshiyawaitakawo omonkyaaatyaim Inintakaantaitanewo, oyaawenta akanta imonkaatya awentaashiretantlyaari, te añaawetawo asaikashiwaitya antayetairo anintakaanekiini aakapaini. ²⁴Pairani iyotaane owayetai Inintakaantaitanewo, oshiyakaakai ryotagaitziri eentsi ryotantyaawori oita ranteri. Irootake yotakagairori eejatzi awentaashiretantaariri Cristo, iro opoñaantaari rotampatzikashiretantsaire awentaashiretaarira. ²⁵Arira ayoyetairi awentaashiretaari, te okowanai iyotagai Inintakaantaitanewo oita antayetairi. ²⁶Tema awentaashirer powayetanairo Cristo, itomi rowayetanaimi Pawa. ²⁷Pikaatzira pomitsitsiyaawentaari Cristo, oshiyanaawo iriime pinkithaatokotaiya. ²⁸Tema pikaatzzi pawentaashiretanaari Jesucristo, tekaatsi ramaakitanairi irirori, okantaweta: aakarika Judá-ite, terika a-judá-itete, aakarika imperataarewo, terika amperataarewotzi, aakarika shirampari, iroorika

tsinane, tema tekaatsi oyetya jiroka, awithaawakagaiya maawoini.

²⁹Tema awentaashire powayetanairi Cristo, oshiyawaitanaawo eerokame incharinentayetyaame Abraham-ni, eerokatake ñagairone okaatzi ikashaakagaitakeriri irirori.

4 ¹Pinkeme nonkante eejatzi. Roshiyakoitakari apaani eenchaaniki rashitakaari ipaapate rowaagawo ikashaakairiri paata arika rantaritake. Okantawetaka iriiwetaka ashitawo rowaagawo, eeniro reentsitzi, roshiyakotakari apaani imperataarewo, ²tema eenitatsi kempoyiiniriri rowaagawo rashitakaariri ipaapate. Arika rantaritake paata, imonkaataiya ikantakeriri ipaapate, aripaite impaitairi rashitakagaitariri pairani. ³Ari akantawetari pairani aakapaini, oshiyakotari ikantaga eenchaaniki, oshiyakotzitawetakari imperataarewo, amonkaatashitakawo rametapiintaitari jaka isaawiki. ⁴Iri kantacha Pawa imonkaapaitetapaakaga, rotyaantakeri Itomi, itzimantapaakawo apaani tsinane, ari rimonkaatapaintziro eejatzi irirori Inintakaantaitanewo. ⁵Iro rotyaantantakariri ompoñaantyaari risaikashiwaitantaiyaari monkaawetawori Inintakaantaitanewo. Iroowa añaantaawori itomiyetai Pawa. ⁶Tema itomi pinayetatzsi Pawa, rotyaantakemiri Tasorenkantsi inampishiretantaimi. Iriitake ñaawaitakagairi arika amanayetya, akantzi: “¡Nopaapaté, Ashitanarí!” ⁷Piñaakero, tera eeroka imperataarewo, itomira Pawa pinayetai. Tema itomi rowayetaimi, ikowake piñaayetairo okaatzi ikashaakagaimiri.

Ampankenatyaaworika Inintakaantaitanewo oshiyakari pimantaarewo

⁸Tema pairani te piyowetari Pawa, apatziro piawanetashitawo riwetsikanepaini atziri, irootake imperayetakemiri. Te opawaweta jirokapaini. ⁹Iroñaaka piyotairi Pawaperotatsiri. Ankante, iriitakera Pawa yotzimiri eeroka, raakameethataimi. ¿Oitaka pikowantari papiitairo pikantaga pairani? Te opantawo. ¿Pikowatzimma poshiyakotaiyaari imperataarewo? ¹⁰Tema pomairentantapiintakawo kiteesheripaini, kashiripaini, eejatzi osarentsipaini. ¹¹Te pinimotakainawo iroñaaka. Aminaashitaka okaatzi niyotaawetakemiri.

¹²Iyekiité, pinkeme nonkantemi: Ontzimatye poshiyaina naaka, tema nipakagairo nokantawetaga pairani, noshiyakotaimiro pikantaiyanira eerokapaini pairani. Te pimanintashiretawakena ¹³nomantsiyawaiwetaga, nisaikimotakemi, ari opoñaanaka netanakawo nokenkithatakagaimiro Kameethari Ñantsi. ¹⁴Tera pimanintashiretawakena piñaawakenaga nomantsiyawaitake, poshiyakaawakena naakame imaninkarite Pawa, paakameethaiyawakenani. Poshiyakaakena eejatzi iriime paakameethatake Jesucristo. ¹⁵Pairani owakera piñaawakena antawoite pikimoshirewentawakena. Ari pantakenawome nonkantemime: “Iyekiite, pinkithoreenawo pokí, pimpenawo.” Iroowa pantantyaaawori

tema antawoite petakotakena. ¿Oitaka kaari pikimoshirewentantaana iroñaaka? ¹⁶ ¿Poshiyakaatzi nokisaneentatzimi nokenkithatakotzirowa irooperori? ¹⁷ Iyekiite, ikaatzi kowayetatsiri intzipinashiretakaimi, ikowatziira pinkenkithashiretakoteri kameethashireri rinayetzi. Tera ikameethashiretzi ikowashita pithainkashiretaina naaka, irootake paakameethatantyaariri irirori. ¹⁸ Ari onkantaitaatyeeyaani iyekiite paakameethatapiintaina, te okowajaanta nisaikimotemi janta. ¹⁹ Notomipaini, antawoite okatsitzimotana nokenkithashiryakotaimira, oshiyawaitakawo okatsitakotzi tsinane. Eekero onkatsitzimotatyeeena irojatzi pimonkaatantakyaawori inintakaakemiri Cristo. ²⁰ Tsika nonkantyaaka nisaikimotantemiri janta nonkenkithawaitakaantemiri kameethaini. Tema te niyote oita awishimotakemiri.

Oshiyakaawentantzí Sara eejatzi Agar

²¹ Nokowi rakena ikaatzi kowatsiri rimonkaatairo Inintakaantitanewo. ¿Tema ikemakotziro tsika okantakota? ²² Jiroka okantakota: Pairani itzimake apite itomi Abraham-ni. Etakawori itomi, iro owaiyakeriri rimperatanewo, iriima itsipa, iro owaiyakeriri iinapero, kaari rimperatanewo. ²³ Tema inintakaanekiini Abraham-ni rowaiyakaantakawori rimperatanewo, irootake tasonkaachari iroñaaka rowaiyantitariri eentsipaini. Iriima owaiyane iinapero, rinashitaka irirori, iriitake ikashaakayitakawori Pawa. ²⁴ Tzimatsi iita oshiyakaawentakeri jiroka apite tsinane, tema apite okaatzi aapatziyawakagaantsi. Tsinane jitachari Agar imperataarewo, iroowa oshiyakariri ikaatzi pankenawaitawori rimonkaaterome Inintakaantitanewo rosankenatakanakeri pairani Pawa ochempiki Sinaí. ²⁵ Jiroka ochempiki Sinaí saikatsiri Arabia-ki, ari iitaitziro eejatzi Agar. Ikaatzi otomintari Agar, roshiyakotakawo tsika okanta rimperaitawo iroori. Iriira oshiyakaawentacha Jerusalén-satzi pankenatawori Inintakaantitanewo. ²⁶ Irooma otsipa tsinane iinapero Abraham-ni kaari rimperatanewo, iroowa oshiyakaawentziriri nintaayetaachane otsipaki nampitsi jitachari eejatzi Jerusalén saikatsiri inkiteki. ²⁷ Jiroka rosankenatakoitakerori pairani ikantaitake:

Okantawetaka te powaiyaneta, maaniromanthaki pinaweta, iro kantzimaitacha antawoite pinkimoshiretai.

Te piñaawetawo pinkemaatsityaari powaiyané,
pinthaamentawentya.

Tema osheki powaiyané, okantawetaka imanintawetakemi, ari panagairo tzimawetachari oime.

²⁸ Iyekiite, oshiyáari aakapaini Isaac otomi iinapero Abraham-ni, tema eenitatsi ikashaakagaitakairi eejatzi aakapaini. ²⁹ Pairani otomi tsinane imperataarewo tzimaintsiri inintakaanekiini Abraham-ni,

antawoite ikisaneentakeri otomi iinapero tzimaintsiri inintakaanekiini Tasorenkantsi. Irootake tasonkakotaachari ejatzi iroñaaka.³⁰ Iro kantzimaitacha, ¿Oitaka ikantaitakeriri Abraham-ni osankenarentsiki? Tema ikantaitake:

Ontzimatye pomishitowero pimperatanewo, iyaataita, aanairi otomi. Tema iri otomi piinapero ashitaiyaawone okaatzi shekitzimotzimiri.

³¹ Ari okantzimaита iyekiite, te otomintayetai imperataarewo, oshiyari iroñaaka otomipaini kaari imperataarewo.

Pinkyaryoowentairo piñeero pisakashiwaitaiya

5 ¹ Tema iriitake Cristo ontsiparyaaokowentairi, irootake añaantaawori asakashiwaitaawo. Ontzimatye ankyaryoowentero, tema te onkameethate apiitairo oshiyakotaiyaari imperataarewo. ² Pinkeme nonkante. Naakatake Pablo kamantzimirori jiroka ñaantsi. Arika pinkowe pimonkaatero ritomeshaanitaimi, aminaashiwitakaga pikemisantairi Cristo. ³ Nokowi napiitero nonkanteri kowatsiri ritomeshaaniyetya, ontzimatye rithotyagairo maawoini Inintakaantaitanewo. ⁴ Tema ikaatzi kowatsiri rimonkaaterome Inintakaantaitanewo ompoñaantyaari rotam patzikashiretantaityaaririme, rontsiparyapithaitakeniri Cristo, te iñiilo neshironkataantsi. ⁵ Irooma aakapaini, ikantakaakawo Tasorenkantsi akemisantairira Cristo, oyaakowentashireri owiri rotampatzikashiretai. ⁶ Eenitatsi tomeshaanitachari, iriima itsipa te ritomeshaanita irirori. Tera okowanaa antairo jiroka rashitaira Cristo. Iroowa kowaperotacha ankemisantaperotairi ompoñaantyaari etakotawakaantaiyaari. ⁷ Pairani kameetha pikanta pikemisantayetanake. ¿Itaka pakaakaakemirori irooperori? ⁸ Te iri pakaakaimirone etanakawori ryoyaawetakemi. ⁹ Tema ikantaitake pairani: “Eepichokiini inaweta kachopathari, aritake imatakero ishimowakairo maawoini opatha.” ¹⁰ Nawentaakari naaka Awinkatharite, iri kenkithashiretakaimine eero poshiretantawo inashiyetachari. Iro kantzimaitacha, ari rowasanketaitakeri kowatsiri intzipinashiretakaimi, inkantawetakya iitarikapaini. ¹¹ Iyekiite, te noshintsineentzimi pitomeshaaniyetya. Ari nonkantyaame, ¿Arima inkisaneentawentaitakenawome nokenkithatakotzirowa ikentakoitakeriri Cristo? ¹² Iro kantzimaitacha, ikaatzi kowayetatsiri intzipinashiretakaimi, nokowake naaka iri pithokashitachaneme ritotaanikitya irirori.

¹³ Pinkeme nonkante iyekiite. Ryoyaayeetaimi eeroka piñaantaiyaawori pisakashiwaitaiya. Iro kantzimaitacha, te onkameethate pantayetanairo okaatzi pinintakaashiwaitari eeroka. Iroowa kameethatatsi petakotawakaayetaiya. ¹⁴ Osheki inaweta ñaantsi rosankenaitakeri Inintakaantaitaneki, iro kantzimaitacha apaani okanta kowaperotachari ayotairi, okantzi:

Petakotaiyaari pisheninka, poshiyakagairo petakotawo piwatha eeroka.

¹⁵Irooma arika powatsimaawakagaiya, pinkisawakagaiya eejatzi, ari piñaakero pimpeyashiretawakagaiya.

Iñaamatashitaitari, eejatzi ikowakaantziri Tasorenkantsi

¹⁶Pinkeme nonkante: Arika pantapiintairo ikowakaimiri Tasorenkantsi, ari pipakagairo piñaamatashitari. ¹⁷Tema tzimatsi piñaamatashiyetari eeroka, tzimitacha ikowakaimiri Tasorenkantsi. Te oshiyawakaa jiroka, inashiyeta. Ari okanta eero pantapiintantawo piñaamatashiyetari. ¹⁸Tema iririka Tasorenkantsi antakaanaimirone inintakaimiri, te pañiimotairo Inintakaantaitanewo. ¹⁹Te romanta antapiintzirori iñaamatashiyetari, jiroka ikantayeta: Te ikinatawo itsipatari, imayempiwaitzi, ipankenatawakaawaita, ñaathatashiwaitantaneri rini, ²⁰ramanayetari riwetsikaitanewo, isheryaayeta, ikisaneentawakaawaita, riñaanaminthatawakaiyani, te rawentaawakaa, ikatsimatawakaa, ikoshekawakaa, te rariperotawakaa, te raapatziyawakaa, ²¹ikisaneentakotawakaawo rashiyetari, ritsitokawakaa, ishinkiwaiyeta, iñaamakitakawo roimoshirenkawaitya rantantyaawori kaariperori, rantayetziro tsikarika oiyeta. Tema irootake noshintsineentakemiri pairani eero pantantayetawo jiroka. Arika pantayetakero, eero piñiiro impinkathariwentaimi Pawa. ²²Irooma okaatzi rantakaantziri Tasorenkantsi, ari añairo etakotantya, thaamenta ankantya, kameetha asaikanai, eero athaawakowaita, neshironka ankantante, aakameetha ankantante, oshiretanaiya kameetha, ²³tsinampashire ankantya, eero añaamawaitashitawo oitarika. Te ithañaapithatairo Inintakaantaitanewo antairo jirokapaini. ²⁴Iro kantacha, ikaatzi pakagairori kaariperori rashiyetaari Cristo, oshiyawaitakawo inkentakotaatyerome okaatzi iñaamatapiintashitari rantashiyetyaarime irirori.

²⁵Tema risaikashiretantaira Tasorenkantsi, ontzimatye antayetairo okaatzi ikowakaayetairi. ²⁶Te okameethatzi asagaawentawaitya, te okameethatzi ankantzimoneentakaawaitaityaari asheninkapaini, te okameethatzi ankisaneentakowaiteri rashiyetari itsipa.

6 ¹Iyekiite, arika piñe tzimatsiri iyenakaashitanewo, tema antakishireri pikantaka eeroka, pinkaminairi. Paamaawentya pikishirikari, otzimikari piyenakaashitanewo eeroka. ²Pamitakotawakaayetanaiya, poshiyakagairo petsinaryaakotawakagaatyeyaaame arika inataitero tenari. Iro ompoñaantyaari pimonkaatairo pantayetanairo ikowakaimiri Cristo. ³Tzimatsirika kenkithashirewaitachari, inkante: "Iriiperori nini naaka." Apaniroini ramatawiwaitaka tema tekaatsi iimatsitya irirori. ⁴Thame ankenkithashiretakotya maawoini, onkene ankimoshirewentawaitya.

Eero akantashirewaitzi: “Nanairi jirinta.” ⁵ Tema maawoini antayetziro oitarikapaini.

⁶ Ikaatzi ikenkithatakaapiintaitziri riñaane Pawa, ontzimatye ripinaiteri kenkithatakaantatsiri, tema eenitatsi koityiimotariri irirori.

⁷ Tekaatsi materone ramatawiteri Pawa. Ikaatzi kowawetachari ramatawiterime, apaniroini ramatawaitaka. Oshiyawaitakawo oitarika impankitaiterime, arika onkithokitanake eero opashinitizi okithoki irojatzi rowiitaite tsika okanta ipankitaitakeri ketziroini. ⁸ Ari ikantari ikaatzi antapiintakerori iñaamatashiyetari, oshiyawaitakawo rowiitaatyeerome owasanketaantsi. Iriima ikaatzi antayetanairori ikowakaantziri Tasorenkantsi, oshiyawaitakawo iri owiitaironeme kañaanetaantsi. ⁹ Ontzimatye aamaawentya eero aperawentantawo antayetairo kameethayetsiri. Eekero aatakaanakityeero eero okantzimoneentawaitai, iro añaantaiaawori oshiyawetakawori rowiitaitakeri. ¹⁰ Irootake okowaperotantari aneshironkayetairi maawoini, aaka kyaayoowentaperotawakaachane akaatzira akemisantayetai.

Ithaamentawo Pablo ikentakowentakari Cristo

¹¹ Iyekiite, naakaga osankenatzimirorjiroka, antawopaini nokantayetakemiro. ¹² Tema ikaatzi shintsineentakemiri pitomeshaaniyetya, inintakaashiwaitawo irirori, rinimotakaantyaaririme ikaataiyinira. Iro ompoñaantyaari eero ikoshekawentaitantari inkenkithatakoteririka Cristo ikentakotaitakeri. ¹³ Tema ikaatzi tomeshaanitainchari, te rimonkaamatsitziro Inintakaantaitanewo. Iro kantacha ishintsineentakemi eerokapaini pitomeshaanitaiyaani, iroowa ompoñaantyaari rasagaawentantyaari arika rimatakaakemiro ishintsineentzimir. ¹⁴ Irooma naaka te nokowi nasagaawentawaitya iro nokowataike nonthaamentaiyaawo ikentakoitakerira Awinkatharite Jesucristo. Tema ikentakowentakena naaka Cristo, oshiyawaitanakawo onkamapithatakityeenname isaawikisato, ari nokantzimotakawo ejatzi naaka nokamapithatakero isaawikisato. ¹⁵ Tekaatsi aitzimotanaiyaari Cristo aakarika tomeshaanitaarewo, terika atomeshaanita. Iro kowaperotanaachari roshiyakaayetai owakerame riwetsikayeetai.

¹⁶ Inkaate kemisantayetairone nokantayetakeri, ari risaikayetai kameetha, neshironka rowayeetairi. Ari inkantayetaiyaari ikaatzi rashiperotaari Pawa iroñaaka, ikantawetakarira pairani Israel-iiete.

¹⁷ Ari okaatapaake iyekiite, te nokowi inkoshekawaitaitena. Tema osheki rowirontawentaitakenari Awinkatharite Jesús.

Weyaantawori wethataantsi

¹⁸ Iyekiite, onkamintha ineshironkayetaimi Awinkatharite Jesucristo. Ari onkantaitaatyeeyaaani.